



165164

新安吳東巖輯

陶詩彙注



拜經堂藏板

世徒見陶徵士淵明讀書不求甚解遂於書中一切疑義略而不求析此大惑也徵士讀書非不解也要以解解之以不解解之不求其甚焉斯已耳甚之爲言太過也猶仲尼不爲己甚之甚明乎斯旨則於讀陶詩也思過半矣諸家論徵士詩者寔繁有徒惟蘇黃楊陸之說得其解學者可覽而知焉惟是陶詩題甲子一事爲後世未決之疑是何也觀集中始庚子迄丙辰凡十七年皆晉安帝時所作初不聞題隆安元興義熙之號若九日閑居詩有云空視時運傾擬古第九章有云忽值山河

改此爲宋受晉禪後作無疑不知何故反不書以
甲子耶善乎吾家景濂學士之言曰其說蓋起於
沈約宋書之誤而李延壽著南史五臣注文選皆
因之烏虜淵明之清節其亦待書甲子而始見耶
此真解人可決疑矣後之學者正不必於此處索
解解且求其甚也新安吳子東巖喜讀陶詩常輯
諸家注衷以已說劄爲四卷要皆解其所當解而
不解其所不必解予以其有合於徵士不求甚解
之旨而賞之蓋自昔裴松之注三國劉孝標注世
說酈道元注水經世稱三奇注他如杜弼注老子

何偃注莊子逍遙篇亦皆有聞於時大都性好其
書則益求解耳如司馬膺之好讀太玄經因注蜀
都賦每云我欲與楊子雲周旋今觀東巖斯注也
殆欲與五柳先生相周旋也者尚友古人樂共晨
夕其亦徵士所期之素心人也與東巖注成將梓
行請予序遂書諸簡首康熙甲申午日商丘宋犖
撰

古詩自漢而下定以靖節爲宗其詞旨冲澹彌樸
彌旨真所謂清水出芙蓉天然去雕飾者也後人
窮搜心力猶不免刺口菱芡柳子厚韋蘇州白香
山蘇子瞻皆善學陶刻意髣髴而氣韻終不似捫
蝨子謂子厚語近而氣不近樂天學近而語不近
東坡和陶百餘篇亦微傷巧蓋皆難近自然也而
或以爲知道或以爲逃名至舉以爲隱逸詩人之
宗則尤非知陶詩者靖節自以先世宰輔遭世末
流託諷夷齊荆軻寄懷綺角絕非沉冥無意於世
者比也後人顧惑於休文朱書甲子之誤遂欲句

櫛字比以爲譏切寄奴抑又泥矣昔黃鶴魯豈注
杜年經月緯幾於浣花詩史竟作新舊唐書識者
訛焉而至不善者莫如李善輩之注文選不惟訓
詁俗習重沓牽復而雕傷詩旨改竄經籍翻使作
者命意半失於述者之明可嘆已余故與程君偕
柳有刪補昭明選詩注一書竊欲一正其譌尚未
卒業而陶詩則少從先君子授讀三十年未脫手
凡見有片言卽筆之旣而屢削其藁今所存者什
之二三而已繁而雜不若簡而真况靖節本無意
於雕飾其詩而後人乃敢於雕飾其注耶瞻泰不

才識卑而見尠安從窺靖節藩籬唯性之所嗜強
爲索解綿津宋中丞以爲有合於靖節之旨爲序
以傳余滋懼已而門人程生崧請曰方今

聖學休明詩壇鼓吹海內詞人注杜注韓注白注
蘇標新鬪麗熠燿縹緗而獨無注陶善本行世豈
真謂清廟明堂之音不儷伯牙之琴蘇門之嘯耶
余以其有激於鍾記室詩品之言爰授而梓之康
熙乙酉春日新安吳瞻泰撰

陶詩彙注目錄

卷首

凡例

傳

吳仁傑年譜


王質年譜

卷一

停雲四首

時運四首

榮木四首



贈長沙公族祖四首

酬丁柴桑二首

答龐參軍六首

勸農六首

命子十首

歸鳥四首

卷二

形影神

形贈影 影答形
神釋

九日閒居

游斜川

示周續之祖企謝景夷三郎

乞食

諸人共遊周家墓柏下

怨詩楚調示龐主簿鄧治中

答龐參軍

五月旦日和戴主簿

連雨獨酌

移居二首

和劉柴桑

酬劉柴桑

和郭主簿二首

於王撫軍座送客

與殷晉安別

贈羊長史

歲暮和張常侍

和胡西曹示顧賊曹

悲從弟仲德

卷三

始作鎮軍叅軍經曲阿

庚子歲五月中從都還阻風於規林二首

辛丑歲七月赴假還江陵夜行塗口

癸卯歲始春懷古田舍二首

癸卯十二月中作與從弟敬遠

乙巳歲三月爲建威叅軍使都經錢溪

還舊居

戊申歲六月中遇火

己酉歲九月九日

庚戌歲九月中於西田穫蚤稻

丙辰歲八月中於下潁田舍穫

飲酒二十首

止酒 述酒

責子

有會而作

蜡日

卷四

擬古九首

雜詩十二首

詠貧士七首

詠二疏

詠三良

詠荆軻

讀山海經十三首

輓歌詩三首

聯句

桃花源

附見

讀史述九章

卷末

諸家詩話

綺園論陶

凡例

北齊陽僕射休之序錄云陶集一本八卷無序一本六卷并序目編比顛亂兼復缺少梁蕭統所撰八卷合序目傳誄而少五孝傳四八目然編錄有體次第可尋今錄統所闕并序目等合為一帙十卷此陽本與蕭本并傳為陶集所由始隋經籍志潛集九卷唐藝文志潛集五卷所載互異文獻通考稱吳氏西齋目有潛集十卷疑即休之本也休之本出宋丞相庠家虎丘寺僧思悅云永嘉周仲章太守家藏宋丞相刊定之本於疑闕處甚有所

補憾此本今不傳也思悅采拾衆本重定爲十卷刻於治平三年世所傳宋槧卽此本耳明何燕泉孟春張潔生爾躬二本皆祖之何注較詳訛缺亦不少而詩注四卷單行則始自宋番陽湯文清漢世所引東澗者也又元劉坦之履選詩補注中箋陶至數十首雖非專本亦可觀明黃維章文煥有陶詩析義四卷皆箋已見多所發明是編專錄其詩祖於湯黃而實舉陶之所長不爲略也

宋時河南吳斗南仁傑有靖節年譜一卷張季長續辨證雜記羣賢論靖節語所謂蜀本也世所傳陶集皆七年譜余友汪西亭立名錄以見貽後程偕柳元愈又以宋王質所撰紹陶錄年譜相証互有發明今并著之簡端

陶詩次序紊亂自陽僕射時已然吳斗南年譜亦或失實如辛丑歲游斜川詩首有開歲倏五日句俗本訛爲五十年譜便改辛丑爲辛酉以實之與詩序迥不合未免以詞害志至四言五言卷帙旣分前後倒置今亦不敢妄更悉遵舊本觀者自能會之唯桃源詩本在記內今并讀史述九章附於四卷之末

陶詩紀甲子之說始於宋書而文選因之黃魯直
秦少游皆惑其說治平中虎丘僧思悅始辨其非
而蔡采之碧湖雜記猶曲爲之說以爲元興以後
劉裕秉政名雖爲晉已有革代之基故淵明所題
皆書甲子以此論淵明更非本懷夫國猶其國而
預擬二十年後之興亡以標異其詩題豈臣子之
所忍言哉但其一腔忠憤亦時流露於意言之表
凡有顯指易代者始爲標出其餘若劉坦之黃維
章之說非不創新罔敢闖入

世所傳陶集鏤版旣訛相沿日久如詠三良序康
公從亂命而曰治命讀山海經十章同物旣有慮
而曰無慮念彼懷王世而曰懷生世一字之誤害
理爲甚今從黃本改之其餘字句互異者兩存句

下

田園詩陳述古本止五首俗取江淹種苗在東臯
爲卒章卽醴陵集擬古詩三十首之一蓋文通擬
陶者也遯齋閑覽已辨其誤問來使一首亦傳爲
江文通作西清詩話謂此章獨南康與晁文元家
二本有之湯文清以爲晚唐人所作郎瑛七修類
稿謂是宋蘇子美詩混入陶集四時一章爲顧長

康詩載許彥周詩話今并刪之從厥舊也
題下小序必作者自題其命篇之意方得書并序
二字近人注詩或指前人之所注以爲序殊失作
者詞氣余刪補昭明選詩輯注如此類者甚夥悉
改置小字從注例也是集如蜡日二疏三良皆非
序體其爲舊注無疑今改從注

陶集舊無詳注黃本不撫故實悉抒己意雖詳無
訓詁氣爲今之善本唯牽合易代事太多未免微
鑿集中取其說者什之三四今於舊本所有者曰
原注諸家著論署某人徵引典故標其書唐宋以
來詩話專於某篇發明者注篇下其餘汎論悉置
卷末各以類從不專以時代次第覽者詳之其言
涉荒誕失靖節詩旨者從削茗溪漁隱叢話中或
論和陶之作於陶詩無涉者亦不錄

瞻泰少嗜陶以案頭俗本訛誤間有考正徵引箋
之紙尾後得湯東澗劉坦之何燕泉黃維章諸本
漸次加詳而吾友汪于鼎洪度王名友棠各有箋
注亦折衷采錄宋中丞商丘先生見而悅之爲序
以行適秀水朱檢討竹垞先生來廣陵以疑往質
因出示其所弄鈔本詩話廣所未備又泰州沈興

之默同邑洪去蕪嘉植汪文治洋度程偕柳元愈
余叔綺園菘弟衛猗瞻淇商確駁正裨益良多門
人程夔震峯篤志好古日夕手錄吟諷亦間抒所
見讐校既清代付剞劂故畧述其緣起如此

陶淵明傳

梁昭明太子蕭統撰

陶淵明字元亮或云潛字淵明

晉書潛字元亮宋書潛字淵明或云淵明字元亮南

史潛字淵明或云字深明名元亮瞻泰按張續曰梁昭明太子傳稱陶淵明字元亮顏延之誄亦云有晉徵士潯陽陶淵明以統及延之所書則淵明固先生之名非字也先生作孟嘉傳稱淵明先親君之第四女嘉於先生為外大父先生又及其先親義必以名自見豈得自稱字哉統與顏延之所書可信不疑晉史謂潛字元亮南史謂潛字淵明皆非也先生於義熙中祭程氏妹亦稱淵明至元嘉中對檀道濟之言則曰潛也何敢望賢年譜云在晉名淵明在宋名潛元亮之字則未嘗易此言得之矣

潯陽柴桑人也曾祖侃晉

大司馬

晉書大司馬侃之曾孫祖茂武昌太守

淵明少有高趣博學善屬

文穎脫不羣任真自得嘗著五柳先生傳以自況
曰先生不知何許人也亦不詳姓字宅邊有五柳

樹因以為號焉閑靜少言不慕榮利好讀書不求甚解每有會意欣然忘食性嗜酒而家貧不能恒得親舊知其如此或置酒招之造飲輒盡期在必醉既醉而退曾不吝情去留環堵蕭然不蔽風日

宋書作風雨

短褐穿結簞瓢屢空晏如也嘗著文章自娛

頗示已志忘懷得失以此自終

晉書南史有其自序如此五字

時人謂

之實錄親老家貧起為州祭酒不堪吏職少日自解歸州召主簿不就躬耕自資遂抱羸疾江州刺史檀道濟往候之偃卧瘠餒有日矣道濟謂曰賢者處世天下無道則隱有道則至今子生文明之

世奈何自苦如此對曰潛也何敢望賢志不及也

道濟饋以梁肉麾而去之

晉書宋書無檀道濟一段

後為鎮軍建威

叅軍謂親朋曰聊欲絃歌以為三徑之資可乎執

事聞之以為彭澤令不以家累自隨送一力給其

子書曰汝旦夕之費自給為難今遣此力助汝薪

水之勞此亦人子也可善遇之

晉書宋書無家累自隨一段

公田悉

令吏種秫曰吾嘗得醉於酒足矣妻子固請種秔

南史秔作粳

乃使二頃

宋書南史作二頃晉書作一頃

五十畝種秫五十畝種

粳

晉書素簡貴不私事上官

歲終會郡遣督郵至縣吏請曰

晉書作吏白

應東帶見之淵明歎曰我豈能為五斗米折腰向

鄉里小兒

晉書吾不能為五斗米折腰奉事鄉里小人邪

即日解綬去職

晉書義熙三年

解印賦歸去來徵著作郎不就

宋書南史義熙末徵著作佐郎不就晉書項之徵著作郎不就

既絕州郡親謁其鄉親張野及周旋人羊松齡龐遵等或有酒邀之或要之共至酒坐雖不識主人亦欣然無忤酣醉便返未嘗有所造詣所之惟

至田舍及廬山遊觀而已

江州刺史王弘欲識之不能致也淵明

嘗往廬山弘命淵明故人龐通之齎酒具於半道

栗里之間邀之淵明有脚疾使一門生二兒舁

諸本作舉

籃輿既至欣然便共飲酌俄頃弘至亦無忤也

晉書刺史

王弘以元熙中臨州甚欽遲之後自造焉潛稱疾不見既而語人云我性不狎世因疾守閑幸非潔志慕聲豈敢以王公紆軫為榮邪夫謬以不賢此劉公幹所以招謗君子其罪不細也弘每令人候之密知當往廬山乃遣其故人龐通之等齎酒先於半道邀之潛既遇酒便引酌野亭欣然忘返弘乃出與相見遂歡晏窮日潛無履弘顧左右為之造履度潛便於坐申脚冷度焉弘要之還州問其所乘荅云素有脚疾向乘籃輿亦足自反

乃令一門生二兒舉之共至州而言笑賞識不覺其有美於華軒也弘後見輒於林澤間候之至於酒米乏絕亦時相瞻嘗言夏月虛閒高卧北窓之下清風颯至自謂羲皇上人即接性不解音云云

先是顏延之為劉柳後軍功曹

在潯陽與淵明情款後為始安郡經過潯陽日造

淵明飲焉每往必酣飲致醉弘欲邀延之坐彌日

不得延之

瞻泰按宋書酣飲致醉下即接臨去云云無弘欲邀延之坐十二字於上下文亦順然此多一層意南史同

臨去

留二萬錢與淵明淵明悉遣送酒家稍就取酒嘗

九月九日

南史宋書多無酒二字

出宅邊菊叢中坐久之滿手把

菊忽值弘送酒至即便就酌醉而歸

晉書顏延之及把菊二事不載

淵明不解音律而蓄無絃琴一張每酒適輒撫弄以

寄其意

晉書蓄素琴一張絃徽不具每朋酒之會則撫而和之曰但識琴中趣何勞絃上聲

貴賤造之者

同詩

傳

有酒輒設淵明若先醉便語客我醉欲眠卿可去
 其真率如此郡將常候之值其釀熟取頭上葛巾
 漉酒漉畢還復著之時周續之入廬山事釋惠遠
 彭城劉遺民亦遁迹匡山淵明又不應徵命謂之
 潯陽三隱後刺史檀韶苦請續之出州與學士祖
 企謝景夷三人共在城北講禮加以讐校所住公
 廨近於馬隊是故淵明示其詩云周生述孔業祖
 謝響然臻馬隊非講肆校書亦已勤晉書南史宋書皆無周續之事其
 妻翟氏亦能安勤苦與其同志南史其妻翟氏志趣亦同能安苦節夫耕於前妻鋤於後
 自以曾祖晉世宰輔恥復屈身後代自宋高祖王

業漸隆不復肯仕

宋書所著文章皆題其年月義熙以前則書晉氏年號自宋初以來惟云甲子而已南史因之

元嘉四年將復徵命會卒時年六十三世號靖節

先生

資治通鑑綱目大書元嘉四年冬十一月晉徵士陶潛卒書法曰潛卒於宋書晉何潛始終晉人也綱目予節故通鑑不書於是特

書之是故晉亡潛心乎晉則卒書晉唐亡矣張承業心乎唐則卒書唐徵士書卒終綱目一人而已矣發明曰陶潛在晉乃太尉侃之孫自其初年出處大致亦有可觀至劉宋移國恥復屈身遂不出仕卒能保全名節故綱目特以晉處士書之明其不失身於宋氏獨得為晉全人也然通鑑是年不載其事綱目取其前史以激千載之清風爾嘗因是考之晉隱逸傳不見其不屈之意至南史始著其說且載檀道濟嘗饋梁肉麾而去之事則潛之此意顯然明白今分注亦本此為說其有關於世教多矣

陶靖節先生年譜

宋河南吳仁傑斗南編次

先生晉大司馬長沙郡公侃之曾孫按梁昭明太子著先生傳云自以曾祖晉世宰輔耻復屈身後代自宋高祖王業漸隆不復肯仕惟先生大節如此故義熙初元去彭澤未有著廷之命亦不拜時晉猶未禪也先生雖晉臣未嘗一食宋粟然其卒在元嘉中故晉書有本傳沈約宋書李延壽南史又皆有傳後世因以先生爲宋人隋經籍志稱宋聘士陶潛集吳氏西齋錄稱宋彭澤令陶潛集者

誤也今取晉故官表之篇端從先生本志云
晉哀帝興寧三年乙丑

先生生於是年

海西公太和元年丙寅

六年辛未

是年冬簡文卽位改元咸安

簡文帝咸安二年壬申

孝武帝寧康元年癸酉

太元元年丙子

祭程氏妹文云慈妣蚤世我年二六先生生於乙

丑至是十有二歲丁母夫人孟氏憂夫人晉故征

西大將軍長史孟嘉第四女大司馬侃外孫也

十年乙酉

示龐主簿鄧治中詩云弱冠逢世阻按晉紀及五行志太元八年春三月始興南康廬陵大水南康平地五尺十年夏五月大水秋七月旱饑先生時年方冠連年旱潦饑饉故云

十六年辛卯

有始春懷古田舍詩二首集本作癸卯字誤也此詩首聯云在昔聞南畝當年竟未踐則是此年方

有事於田疇故明年有投耒學仕之語按本傳稱先生躬耕自資亦在爲鎮軍叅軍之前以此知始踐南畝決非癸卯歲集本誤明矣

十八年癸巳

是歲爲江州祭酒未幾辭歸州復以主簿召不就飲酒詩云疇昔苦長飢投耒去學仕又云是時向立年蓋先生以二十九歲始出仕實癸巳歲也本傳云親老家貧起爲州祭酒不堪吏職少日自解歸此飲酒詩下句所謂拂衣歸田里者也

十九年甲午

是年先生三十矣有悼亡之戚故示龐主簿鄧治中云始室喪其偏禮三十曰壯有室左傳齊崔子生成及彊而寡娶東郭氏杜註偏喪曰寡先生與子儼等疏云汝輩雖不同生當思四海兄弟之義他人尚爾況共父之人哉先生蓋兩娶本傳稱其妻翟氏志趣亦同能安苦節夫耕於前妻鋤於後則繼室實翟氏

安帝隆安元年丁酉

四年庚子

始作鎮軍叅軍有經曲阿詩曲阿今丹陽縣也本

傳稱躬耕自資遂抱羸疾復爲鎮軍建成威參軍事
按晉官制鎮軍建成威皆將軍官各置屬掾非兼官
也以詩題攷之先生蓋於此年作鎮軍參軍至乙
巳歲作建成威參軍史從省文耳文選經曲阿詩李
善註云宋武帝行鎮軍將軍按裕元興元年爲建
威將軍三年行鎮軍將軍與此先後歲月不合先
生亦豈從裕辟者善註引用非是此年五月又有
從都還阻風規林詩云一欣侍溫顏則先生就辟
至是乃挈家居京師故還舊居詩有疇昔家上京
之句葛文康云先生阻風規林詩落句云靜念林
園好人間良可辭是歲春秋三十六明年夜行塗
口詩云投冠旋舊廬不爲好爵縈卒踐其言自彭
澤歸優游里巷者二十有二年

五年辛丑

有七月赴假還江陵夜行塗口詩文選此詩遙遙
至西荆李善註云時京都在東故謂荊州爲西也
今集本作南荆者非葉少蘊左丞云淵明隆安庚
子從都還明年赴假還江陵荊州刺史自隆安三
年桓玄襲殺殷仲堪卽代其任至於篡未別授人
淵明之行在五年豈嘗仕於玄耶傳云爲鎮軍參

陶詩集注 卷首 三
軍按劉裕以大亨三年逐桓玄行鎮軍將軍事豈
又嘗仕於裕耶桓玄劉裕之際而淵明皆或從仕
世多以為疑此非知淵明之深者未論實為玄裕
否淵明在隆安之前天下未有大故且不肯仕自
庚子至乙巳正君臣易位人道反覆之時淵明乃
肯出仕乎蓋潯陽上流用武之地玄與裕所由交
戰出入往來者也淵明知自足以全節而不傷生
故迫之仕則仕不以輕犯其鋒棄之歸則歸不以
終屈其已豈區區一節之士可以窺其間哉自去
彭澤劉裕大業已成天下亦少定遂不復出後十

四年召為著作佐郎則淵明可以終辭矣仁傑按
先生為鎮軍非從劉裕已具去歲譜中至仕於江
陵則又有不然者先生以庚子歲作鎮軍叅軍乙
巳歲去彭澤不復仕故還舊居詩云疇昔家上京
六載去還歸自庚子至乙巳凡六年既云家上京
又有從都還阻風詩則是未嘗居江陵使先生果
仕於玄不應居京師設居江陵不應以為上京故
先生答龐叅軍序云龐從江陵使上都過潯陽凡
言京都皆指建業則先生未嘗居江陵明甚其祭
程氏妹文云昔在江陵重罹天罰兄弟索居乖隔

楚越伊我與爾百哀是竊以先生阻風詩推之一
欣侍溫顏再喜見友于則先生蓋有兄弟至江陵
丁外艱而兄弟乖隔獨與女弟居喪者蓋先生兄
弟在京師而女弟居江陵豈先生親闈因過其女
以疾留江陵遂不起耶先生以七月還江陵而祭
妹文有蕭蕭冬月之語則居憂在是歲之冬

元興元年壬寅

桓玄舉兵犯京師政自己出改元大亨是年先生
居憂

二年癸卯

先生服闋閒居有飲酒詩二十首內一篇上云是
時向立年下云亭亭復一紀又別篇云行行向不
惑是年三十九矣十二月桓玄篡晉改元永始是
月先生與從弟敬遠詩云寢跡衡門下邈與世相
絕又飲酒詩稱夷叔在西山且當從黃綺皆有激
而云

三年甲辰

先生四十歲有榮木及連雨獨飲詩是歲桓玄伏
誅晉帝反正於江陵未幾桓振反三月建威將軍
劉懷肅討振斬之天子乃還京師是年懷肅以建

陽言彙注 卷首 古
威將軍爲江州刺史先生實叅建威軍事從討逆黨於江陵有使都經錢溪詩蓋自江陵以使事如建業尋歸潯陽有還舊居詩八月起爲彭澤令在官八十餘日解印綬去有歸去來辭并序顏延之爲先生誄云母老子幼就養勤匱遠惟田生致親之義追悟毛子捧檄之懷初辭州府三命後爲彭澤令按先生十二歲失所恃今延之言其母老蓋繼母也韓子蒼舍人云以淵明傳及詩考之自庚子歲始作建威叅軍爲彭澤遂棄官歸凡爲吏者六歲故云六載去還歸然淵明乙巳歲三月尚爲

叅軍十一月去彭澤而云家貧耕植不足以自給何也仁傑以歸去來序考之不言由叅軍爲彭澤蓋自使都之後去官還潯陽其云六載去還蓋在京師居者六年已而歸潯陽舊居故有還舊居詩旣歸而耕植不給於是有弦歌之意所謂脫然有懷求之靡途是也東坡先生言孔子不取微生高孟子不取於陵仲子惡不情也陶淵明欲仕則仕不以求之爲嫌欲隱則隱不以去之爲高古今賢之貴其真也先生自庚子歲作鎮軍叅軍至辛丑秋居憂癸卯外除值桓氏亂間居彌年此年春方

在建成威府未幾復辭去雖六載居京其實爲吏之日少子蒼疑其遽有不給之歎顧第弗深考又以鎮軍爲建成威亦誤也先生之去彭澤也不知者以爲不能爲五斗米折腰鄉里小兒其知者以爲爲女弟之喪也乃若先生之意則有在矣方是時劉寄奴自以復晉鼎於桓氏竊取之餘規模所建漸廣決非臣事晉者故先生見幾而作耳其誨顏延之之言曰獨正者危至方則礙然則先生之不欲爲苟去豈非得明哲保身之道也哉

義熙二年丙午

有歸園田居詩五首味其詩蓋自彭澤歸明年所作也首篇云誤落塵網中一去三十年按太元癸卯先生初仕爲州祭酒至乙巳去彭澤而歸纔甲子一周不應云三十年當作一去十三年此詩今本有六首韓子蒼云陳述古本止五首俗本取江淹種苗在東臯爲末篇乃序行役與前五首不類東坡亦因其誤和之按江淹擬先生田居詩見文選

三年丁未

晉史本傳云義熙三年解印去縣賦歸去來辭按

先生自序去縣以乙巳歲實元年此史誤也五月有祭程氏妹文

四年戊申

六月有遇火詩

五年己酉

有九日詩

六年庚戌

九月有西田穫稻詩

七年辛亥

有與殷晉安別詩其序云殷先作晉安南府長史

掾因居潯陽後作太尉叅軍移家東下作此以贈按宋武帝紀此年改授太尉又按殷景仁傳爲宋武帝太尉行叅軍則所謂殷晉安卽景仁也先生方避世而景仁乃就辟故其詩云語默自殊勢亦知當乖分又云興言在茲春則此詩在春月作八月有祭從弟敬遠文

八年壬子

有雜詩十一首有句云奈何五十年忽已親此事又有示周掾祖謝詩周掾名續之隱廬山與先生及劉遺民號潯陽三隱者江州刺史檀韶苦請續

之出州與學士祖企謝景夷三人共在城北講禮
加以校讐所住公廨近於馬隊故其詩云周生述
孔業祖謝響然臻馬隊非講肆校書亦已勤誚之
也事見蕭德施所著先生傳按南史檀韶從征廣
固及討盧循有功後拜江州刺史征廣固在義熙
五年討盧循在六年則韶爲江州當在此年以後
九年癸丑

有與子儼等疏云告儼俟份佚佟吾年過五十二云
云南史本傳載此文末云又爲命子詩以貽之今
按命子詩是初得子儼時作與疏不合惟責子詩

有五男兒然儼時方年十六俟年十四份佚皆年
十三佟八歲耳先生悼亡在壯歲而前夫人有所
出則責子詩當是四十後所作亦非與子儼等疏
時也東坡云淵明臨終疏告儼等今按疏稱年過
五十而先生享年六十有三則此文又非屬續時
語疏云疾患以來漸就衰損自恐大分將有限則
是因多病早衰之故預作治命耳此後十五年先
生方物故自祭文及擬挽歌辭乃絕筆也

十二年丙辰

八月有於下溪田舍穫詩又有怨詩楚調示龐主

隋言彙注 卷首 六
簿鄧治中云僊仰六九年其年先生五十四時顏
延之爲江州刺史劉抑後軍功曹在潯陽與先生
情款以周續之傳考之抑以是年到官云

十三年丁巳

有贈羊長史詩長史名松齡晉史本傳謂與先生
周旋者是歲劉裕平關中松齡以左軍長史銜使
秦川故有句云路若經商山爲我少躊躇多謝綺
與角精爽今何如與飲酒詩且當從黃綺同意當
桓劉之世先生不出世如避秦也

十四年戊午

詔除著作郎稱疾不就見南史本傳

恭帝元熙元年己未

是歲王宏爲江州刺史本傳云宏欲識淵明而不
能致令人候知當往廬山乃遣其故人龐通之等
先齎酒具於半道栗里間淵明有脚疾使一門生
二兒舁籃輿旣至便忻然共飲宏乃出與相聞要
之還州

二年庚申

夏六月晉禪於宋宋高祖改元永初讀史述九章
自註曰余讀史記有所感而述之首章述夷齊云

陸詩彙注 卷首 六
天人革命絕景窮居采薇高歌慨想黃虞二章述
箕子云去鄉之感猶有遲遲矧伊代謝觸物皆非
當是革命時作近世有校集本者云文選五臣註
辛丑歲七月赴假還江陵詩謂淵明詩晉所作者
皆題年號入宋所作但題甲子而已意者恥事二
姓故以異之思悅考淵明之詩有題甲子者始庚
子距丙辰凡十七年間只九首皆晉安帝時作中
有乙巳歲三月經錢溪作此年秋乃爲彭澤令解
印綬去後十六年庚申晉禪宋淵明傳曰自宋高
祖王業漸隆不復肯仕於淵明出處得其實矣寧

容晉未禪宋前二十年輒恥事二姓所作詩題甲
子而自取異哉矧詩中又無標晉年號者仁傑按
沈約宋書潛自以曾祖晉世宰輔不復屈身後代
自高祖王業漸隆不復肯仕所著文章皆題年月
義熙已前則書晉氏年號自永初以來惟云甲子
而已嘗考集中諸文義熙已前書晉氏年號者如
桃花源詩序云晉太元中又祭程氏妹文云維晉
義熙三年是也至游斜川詩序在宋永初二年作
則但稱辛酉歲自祭文在元嘉四年作則但稱歲
惟丁卯史氏之言亦不誣矣然其祭從弟敬遠文

在義熙中亦止云歲在辛亥要之集中詩文於晉
年號或書或否固不一槩卒無一字稱宋永初以
來年號者此史氏所以著之也史論其所著文章
不專爲詩而發而五臣輒更之曰淵明詩晉所作
者皆題年號此所以啓後世之誤也詳味先生出
處大節當桓靈寶僭竊位號與劉氏創業之初未
嘗一日出仕而眷眷本朝之意自見於詩文者多
矣東坡云讀史述九章夷齊箕子蓋有感而云去
之五百歲吾猶識其意也韓子蒼亦曰余反復述
酒詩見山陽舊國之句蓋用山陽公事疑是義熙

以後有所感而作故有流淚抱中歎平王去舊京
之語淵明忠義如此今人或謂淵明所題甲子不
必皆義熙後此亦豈足論淵明哉唯其高舉遠蹈
不受世紛而至於躬耕乞食其忠義亦足見矣
宋高祖永初二年辛酉

有游斜川詩并序別本作辛丑者非是先生是年
五十七然詩云開歲倏五十或疑是辛亥歲作是
年四十九故言開歲倏五十猶言來歲云爾按馮
衍顯志賦云開歲發春則非謂來歲明矣馬永卿
云廬山東林舊本作倏五日與序所謂正月五日

相應宜以爲正東坡和此篇云雖過靖節年未失
斜川游東坡於時年六十二自辛酉歲論之先生
五十七歲而東坡又過其五亦無傷也

三年壬戌

營陽王景平元年癸亥八月文帝卽位改元元嘉
文選顏延之爲先生誄李善注引何法盛中興晉
書曰延之爲始安郡經潯陽常飲淵明舍自晨達
昏南史傳亦云每過潛必酣飲致醉刺史王宏欲
要延之坐彌日不得延之臨去留二萬錢潛悉送
酒家稍就取酒按延之道過湘州祭屈原文云有

宋五年知以是年之郡

文帝元嘉二年乙丑

贈長沙公詩其序云余於長沙公爲族祖同出大
司馬昭穆旣遠已爲路人經過潯陽臨別贈此詩
按陶侃傳曰封長沙郡公贈大司馬有子十七人
洪瞻夏琦旗斌稱範岱九人附見侃傳先生大父
亦侃子也獨見於先生傳中侃以壬辰咸和七年
薨世子夏襲爵及送侃喪還殺其弟斌庾亮奏加
放黜表未至而夏卒詔以瞻息宏襲侃爵卒子綽
之嗣綽之卒子延壽嗣宋受禪降爲吳昌侯以世

次考之先生於延壽爲諸父行今自謂於長沙公爲族祖意延壽入宋而卒見先生於潯陽者豈其子耶延壽已降封吳昌仍以長沙稱之從晉爵也集本序文良是詩題當云贈長沙公族孫而云族祖者字之誤也一本因詩題之誤輒以意改序文云長沙於余爲族祖按侃子夏襲封長沙公於先生爲大父行史雖不著夏卒之歲月然其卒在庾亮前亮沒以歲庚子寔咸康六年距興寧乙丑歲猶二十五年時先生未生也夏固不與先生同時又按禮經高祖之昆弟六世以外然後親屬竭故

有從父有從祖有族祖蓋同祖爲從父同曾祖爲從祖同高祖爲族祖使侃諸子而在乃先生祖之昆弟服屬近矣安得云昭穆旣遠當曰從祖亦不得云族祖也至若延壽之子則侃之六世孫與先生同高祖先生視之爲族孫故以族祖自居其詩有云同源分流人易世疎又有禮服旣悠之語蓋昭穆至是差遠然至以爲路人則長沙公於宗族之義亦薄矣故又云慨然寤歎念茲厥初觀此則俗本所改序文果非

三年丙寅

是歲五月檀道濟為江州刺史本傳稱道濟往候先生偃卧瘠餒有日矣道濟謂曰夫賢者處世天下無道則隱有道則至今子幸生文明之世奈何自苦如此對曰潛也何敢望賢志不及也道濟餽以梁肉麾而去之然本傳載此在為鎮軍叅軍之前以道濟傳考其歲月知史誤也葉左丞云陶淵明晉書南史皆有傳梁蕭統亦有傳嘗以統傳及顏延之所作誄參之二史大抵南史全取統傳而更其名字統傳云淵明字元亮或云潛字淵明南史云潛字淵明或云字淵明名元亮至晉書直言

潛字元亮統去淵明最近宜得其實既兩見則淵明蓋嘗自更其名字所謂或云潛字淵明者其前所行也淵明字元亮者後所更也統承其後故書淵明為正而謂潛為或說意淵明自別於晉宋之間而微見其意歟顏延之作誄以潯陽陶淵明稱之此欲以其名見也延之與淵明同時且相善不應有誤可以知其為後名與統合不然或謹其名自當稱元亮何以追言其舊字乎仁傑按石林謂先生更名自別於晉宋之間得其微意矣至謂潛與淵明為前所行淵明與元亮為後所更以集與

本傳考之則有可疑按先生之名淵明見於集中者三其名潛見於本傳者一集載孟府君傳及祭程氏妹文皆自名淵明又按蕭統所作傳及晉書南史載先生對道濟之言則自稱曰潛孟傳不著歲月祭文晉義熙三年所作據此卽先生在晉名淵明可見也此年對道濟實宋元嘉則先生至是蓋更名潛矣山谷懷陶令詩云潛魚願深渺淵明無由逃蓋言淵明不如潛之爲晦此尤深得先生更名之意至云歲晚以字行更始號元亮此則承南史之誤耳延之作先生誄云有晉聘士陶淵明

旣以先生爲晉臣則用其舊名宜矣延之與先生厚善著其爲晉聘士又書其在晉之名豈亦因是欲見先生之意耶蕭統不悟其旨乃以淵明爲本名而以潛爲或說傳中載對道濟之語則又云潛自相牴牾其寔先生在晉名淵明字元亮在宋則更名潛而仍其舊字謂其以名爲字者初無明據殆非也本當曰陶淵明字元亮入宋更名潛如此爲得其實其曰深明泉明者唐人避高祖諱故云四年丁卯將復召命會先生卒有自祭文及擬挽歌辭祭文

陶詩集注 卷首
云律中無射挽歌云嚴霜九月中送我出遠郊其
卒當在九月顏延之誄云疾惟疢疾視化如歸則
是以疢疾卒也又云藥劑弗嘗禱祀非恤又紀其
遺占之言曰存不願豐沒無求贍省訃却賻輕哀
薄斂遭壤以穿旋葬而窆自祭文亦曰奢恥宋臣
儉笑王孫又有不封不植之語嗚呼死生之變亦
大矣而先生病不藥劑不禱祀至自為祭文挽歌
與夫遺占之言從容閒暇如此則先生平生所養
從可知矣顏延之取諡法寬樂令終曰靖好廉自
克曰節合二字之美諡焉

年譜

載雲韜堂紹陶錄

宋泰山王質著

元亮高風發於宋晉去就之際君曾祖事晉懋
著勲勞自宋武帝芟元復馬逆揣其末流卽不
出武帝將收賢士以繫人心見要亦不應陶謝
皆世臣君世地色言俱辟而靈運為武帝秉任
最後乃欲詭忠義雜江海遠師送君過虎溪而
却靈運不入蓮社素心皆所鑒知譜具左方

興寧三年乙丑

晉哀帝

君生於潯陽柴桑今德安縣楚城市是父軼名命

子詩云於穆集作仁考澹焉虛止寄迹風雲宜茲愠
 喜陶氏自侃以武功擅世後裔稍襲故風多流亂
 岐蓋折翼之祥發之旁派傳淡傳君父子皆以隱
 德著稱侃女適孟嘉嘉女適君父是生君其氣所
 傳造化必有可言者

大元元年丙子 晉武帝

君年十二失母祭妹文云慈妣早世我年二六

大元九年甲申

君年二十失妾當作妻下同楚調詩云弱冠逢世阻始室
 喪其偏妾翟氏偕老所謂夫耕於前妻鉏於後當

是翟湯家湯莊矯法賜四世以隱行知名亦柴桑

大元十九年甲午

君年三十有歸園田詩云誤落塵網中一去三十
 年初為州祭酒當在其前不堪乃解歸故云久在
 樊籠裏復得返自然尋亦却主簿

隆安四年庚子 晉安帝

君年三十六五月有從都還阻風規林詩當是參
 鎮軍銜命自京都上江陵故在始作鎮軍參軍經
 曲阿詩後父在柴桑故云一欣侍溫顏又云久游
 戀所生父為人度不肯適都當是已舍單行見還

舊居詩軍僚差彊郡吏故云時來苟冥會婉戀憇
通衢投策命晨裝暫與田園疏

隆安五年辛丑

君年三十七正月有游斜川詩云開歲倏五十方
三十七作五日是當是故歲五月還潯陽今歲七
月適江陵有赴假還江陵夜行途中詩留潯陽
年當是予告在鄉至是往赴云閒居三十載自
叅鎮軍以前得三十六年當是不堪勞役遂起歸
意故云詩書敦宿好園林無俗情如何捨此去遙
遙至南荆失父祭妹文云昔在江陵重罹天罰觸

事未遠書疏猶存當是妹自武昌報江陵時父在
柴桑

元興二年癸卯

君年三十九正月有始春懷古田舍詩當是自江
陵歸柴桑復適京都宅憂居家思湓城故有懷古
田舍又云良苗懷新十二月有與從弟敬遠詩云
寢迹衡門下在都亦當是處野

元興三年甲辰

君年四十有連雨獨飲詩云僂仰四十年有飲酒
詩云是時向立年志氣多所恥遂盡介然分終死

歸田里當在壬辰癸巳爲州祭酒之時所謂投耒
去學仕又云冉冉星氣流亭亭復一紀至是得十
二年

義熙元年乙巳

君年四十一三月有爲建威參軍使都經錢溪詩
當是故歲自都還里卽吉庚子始事鎮軍繼事建
威中經雁憂至是得六年復銜命至都其家尚未
歸柴桑還舊居詩云疇昔家上京六載去還歸往
來時經鄉閭不常留稍成疏故云阡陌不移舊邑
屋或時非履歷周故居隣老罕復遺至是始定居

斷他適十一月有歸去來辭九月家留柴桑身往
彭澤至是免歸當是不堪軍役故求縣不堪縣役
故歸家所謂風波未定心憚遠役彭澤去家百里
公田足以爲酒少日眷然有歸與之情平生之志
始決見序及辭甚詳失妹所謂情在駿奔自免去
職是歲劉將軍錄尚書

義熙三年丁未

君年四十三有祭程氏妹文自乙巳至是所謂服
制再周

義熙四年戊申

降詩彙注 卷首 三
君年四十四有六月遇火詩云奄出四十年
義熙五年己酉

君年四十五有九日詩

義熙六年庚戌

君年四十六有西田穫早稻詩

義熙七年辛亥

君年四十七有祭從弟敬遠文云絕粒委務考槃
山陰晨采上藥夕閒素琴當時同志見文甚詳

義熙十年甲寅

君年五十有雜詩云奈何五十年棄官來歸至是

得十年故云荏苒經十載暫爲人所羈

義熙十一年乙卯

君年五十一有與子儼等疏云年過五十又云見
樹木交蔭時鳥變聲亦復欣然五六月北窓下臥
遇涼風暫至自號羲皇上人

義熙十二年丙辰

君年五十二有下渙田舍穫詩云曰余爲此來三
四星火頽當是得此在癸丑甲寅之間

義熙十四年戊午

君年五十四楚調云儻俛六九年召爲著作佐郎

不應是歲宋公爲相國

元熙元年己未

晉恭帝

君年五十五王休元爲江州自造不得見遣其故人龐通之等齎酒於半道栗里要之卽引酌野亭休元出與相聞極歡終日嘗九日抱菊無酒休元餉之有九日閒居詩所謂秋菊滿園時醪靡至當是未獲所遺休元在江州幾六載未審的在何年自乙巳至丁卯訖死未嘗他適獨暫爲休元入州永初元年庚申

宋武帝

君年五十六同隱周續之召至都爲顏延之連挫

義熙間檀韶爲江州邀續之在城北講禮讐書有示周掾祖謝詩云馬隊非講肆校書亦已勤又云但願還渚中從我潁水濱江城尚不欲周往奚況京師劉遺民亦同隱有和劉柴桑詩云挈杖還西廬又云春醪解飢飮其還以春有酬劉柴桑云嘉穗眷南疇又云慨然知己秋其還至是及秋初自西廬移南村有移居詩云聞多素心人樂與數晨夕又云過門更相呼有酒斟酌之遷居殆爲遺民之徒尋還西廬度相距亦不遠與遺民更相酬酢不改賞文析義之時未審的在何年或恐劉柴桑

隱言
卷首
三
似縣令劉或嘗爲此縣存此呼或有命不爲猶續
之嘗命爲撫軍參軍不就因呼周掾皆不可知但
非時爲宰者語皆冷交非熱官丁柴桑詩云秉直
司聰於惠百里此乃當官無疑尋詩鍾情於劉過
厚於周遺民自隱之餘無聞續之在隱之中微婉
君與周劉號潯陽三隱校情義稍有淺深是歲宋
武帝踐祚

景平元年癸亥

宋潯陽王

君年五十九顏延之爲始安過潯陽日造飲酣醉
臨去留二萬錢送酒家相知久間驟見益驩延之

未審何時來柴桑所謂目爾分居及我多假伊好
之洽接簷隣舍當是不詣劉穆之之時又未審何
時去柴桑當是爲豫章世子參軍之時據誄參傳
略見

元嘉三年丙寅

宋文帝

君年六十二檀道濟爲江州時抱羸疾多瘠餒往
候饋以梁肉不受

元嘉四年丁卯

君年六十三有自祭文云律中無射擬挽歌詩云
嚴霜九月中送我出遠郊當是杪秋下世顏延之

書名	陶集注		
版別	冊數	4	紙
議價	24	議價章	58年 5月 日
編號	字第	1574	號

北京市圖書業同業公會印制

陶言集注 卷首
三

誄云視化如歸臨凶若吉藥劑弗嘗禱祠弗恤其
臨終高態見誄甚詳君平生好談歸盡蕭統以爲
處百齡之內居一世之中倏忽白駒寄寓逆旅與
大塊而榮枯隨中和而放蕩豈能勞於憂畏役於
人間最知深心形贈影答神釋本趣略見所謂縱
浪大化中不喜亦不懼應盡便須盡無復獨多慮
惟患不知既已洞知安坐待此夫復何言杜甫許
避俗未許達道識者更詳之

